



Republika e Kosovës
Republika Kosova - Republic of Kosovo



Komuna e Prishtinës
Opština Priština -Municipality of Prishtina

R R E G U L L O R E

PËR ORARIN E PUNËS DHE MBROJTJEN NGA NDOTJA AKUSTIKE NË
SEKTORIN E GASTRONOMISË

Prishtinë, 2022

Në mbështetje të dispozitave të nenit 12, paragrafi 12.2, pika c, nenit 17, pikat e, f dhe nenit 40, paragrafi 40.2, pika a e Ligjit nr. 03/L - 040, për vetëqeverisje lokale ("Gazeta zyrtare e Republikës së Kosovës", nr. 28/2008), nenit 3 dhe nenit 5, paragrafi 3 të Ligjit nr. 03/L-025 për mbrojtjen e mjedisit, nenit 5 të Ligjit nr. 02/L-102, për mbrojtje nga zhurma, nenit 7 të Ligjit nr. 05/L-087 për kundërvajtje, dhe mbështetur në pikën a të Statutit të Komunës së Prishtinës, 01. nr. 110 - 391, të dt. 25.2.2010, Kuvendi i Kryeqytetit, në mbledhjen e mbajtur më 28.12.2022, miratoi këtë

RREGULLORE PËR ORARIN E PUNËS DHE MBROJTJEN NGA NDOTJA AKUSTIKE NË SEKTORIN E GASTRONOMISË

I. DISPOZITAT E PËRGJITHSHME

Neni 1 Qëllimi

Me këtë rregullore përcaktohet orari i punës për subjektet afariste në sektorin e gastronomisë, si dhe parandalimi dhe shmangia e efekteve të dëmshme, duke përfshirë bezdisjen e qytetarëve, si rezultat i ekspozimit të zhurmës së krijuar si pasojë e ndotjes akustike nga sektori i gastronomisë brenda kufijve administrativ të Kryeqytetit të Republikës së Kosovës, Prishtinës (më tej: Kryeqyteti).

Neni 2 Fushëveprimi i Rregullores

Dispozitat e kësaj rregulloreje janë të zbatueshme nga të gjitha subjekteve afariste të sektorit të gastronomisë që operojnë në territorin administrativ të Kryeqytetit.

Neni 3 Përkufizimet

1. Shprehjet dhe përkufizimet e mëposhtme për qëllime të kësaj rregulloreje, kanë këtë kuptim:

1.1. **Sektori i gastronomisë** – përfshin, por nuk kufizohet në subjekte afariste si në vijim: kafene, restorante, bare, klube të natës dhe hapësira të gastronomisë në kuadër të lokaleve që ushtrojnë veprimtari të ndryshme.

1.2. **Zonat** - në të cilat mund të ushtrohet veprimtaria, sipas orarit të përcaktuar në këtë Rregullore, përfshijnë: zonën urbane, zonën industriale dhe zonën rurale, ashtu siç përcaktohet në shtojcën 1 të kësaj rregulloreje.

II. ORARI I PUNËS

Neni 4

Orari i punës në sektorin e gastronomisë

1. Subjektet afariste të sektorit të gastronomisë janë të obliguara t'i përmbahen orarit të punës të përcaktuar sipas kësaj rregulloreje.
2. Orari i punës nënkupton periudhën kohore për fillimin dhe mbarimin e punës, rrjedhimisht shërbimit/shitjes për konsumatorë. Subjektet afariste marrin kohën maksimum 45 minuta para dhe pas orarit të punës/shërbimit për të hapur dhe mbyllur lokalet.
3. Orari për fillimin dhe mbarimin e punës, i përcaktuar me këtë rregullore, duhet të vendoset në hyrje apo në vend të dukshëm të objektit në të cilin ushtrohet veprimtaria e biznesit. Në orar të punës duhet cekur ditët kur nuk punohet.

Neni 5

Periudhat kohore

1. Orari i punës përcaktohet në bazë të llogaritjes verore dhe dimërore, në intervale kohore:
 - 1.1. periudha verore fillon më 1 prill dhe mbaron më 30 shtator;
 - 1.2. periudha dimërore fillon më 1 tetor dhe mbaron më 31 mars.

Neni 6

Orari i rregullt ditor

1. Orari i punës në *kafene* dhe *restorante*, pavarësisht zonës, duhet të jetë brenda kornizave kohore 07:00-24:00, në periudhën verore dhe dimërore.
2. Pavarësisht orarit nga paragrafi 1 i këtij neni, Kryetari i Kryeqytetit me vendim të veçantë, mund të lejojë zgjatjen e orarit edhe për 2 (dy) orë shtesë, me decibelë të njëjtë, gjatë periudhës 15 korrik – 15 gusht, 20 dhjetor – 10 janar, dhe në ditët e festave.
3. Orari i punës në *klube të natës* duhet të jetë brenda kornizave kohore, sipas zonave të caktuara:

3.1. periudha verore, në zonë urbane, nga ora 24:00–03:00, përveç të premteve dhe të shtunave, nga ora 24:00–05:00, dhe në zonë industriale dhe rurale, nga ora 24:00–05:00, përveç të premteve dhe të shtunave, nga ora 24:00–08:00;

3.2. periudha dimërore, në zonë urbane, nga ora 23:00–02:00, përveç të premteve dhe të shtunave, nga orës 24:00–04:00 dhe në zonë industriale dhe rurale, nga ora 23:00–04:00, përveç të premteve dhe të shtunave, nga ora 24:00–05:00.

4. Orari i punës në *hapësira të gastronomisë në kuadër të subjekteve afariste*, që ushtrojnë veprimtari të ndryshme, (p.sh. hotele, motele, salla dasmash, pompa të benzinës, qendra rekreative etj.) duhet të jetë brenda kornizave kohore:

4.1. periudha verore, nga ora 06:00–24:00,

4.2. periudha dimërore, nga ora 07:00–24:00.

5. Përjashtimisht nga paragrafi 4 i këtij neni, subjektet në fjalë mund të punojnë në orare të veçanta, sipas kërkesës dhe aprovimit nga organi komunal kompetent.

6. Për qëllime të këtij neni, hapësirat e gastronomisë (hotele, motele etj.) të cilat organizojnë ndeja të shoqëruara me muzikë pas orës 24:00, konsiderohen klube nate dhe për to do të aplikohen rregullat për klubin e natës.

7. Organet përkatëse të Kryeqytetit kujdesen që pas orarit të punës të subjekteve afariste në lagjet rezidenciale (zona miks, sipas shtojcës 1 të kësaj rregulloreje), të mos bezdisen nga zhurma nga qytetarët. Me këtë rast organet përkatëse të Kryeqytetit përdorin mekanizmat institucional brenda kompetencave ligjore (mbyllja e përkohshme për kalimin e rrugëve specifike, angazhim i policisë në pika me frekuentim të shpeshtë etj.).

Neni 7

Taksa për punën gjatë orarit të natës

1. Subjektet afariste – *klubet e natës*, të cilat sipas kësaj rregulloreje kanë të drejtë të punojnë pas orës 24:00, janë të obliguara të paguajnë taksën e njëhershme, në vlerë prej 10,950 euro për vit.

2. Të gjitha subjektet afariste të përcaktuara në paragrafin 4 të nenit 6, të cilat sipas kësaj rregulloreje kanë të drejtë të punojnë pas orës 24:00, janë të obliguara që të paguajnë taksën e njëhershme, në vlerë prej 3,650 euro për vit.

1. MASAT MBROJTËSE NGA NDOTJA AKUSTIKE

Neni 8

Masat për mbrojtje nga ndotja akustike

Me këtë rregullore përcaktohen masat për mbrojtje nga ndotja akustike, duke përfshirë decibelët e lejuar, pajisjet për matjen e burimit të zhurmës së emituar jashtë (ndotje) dhe gjobat në sektorin e gastronomisë në territorin e Kryeqytetit.

Neni 9

Ndotja akustike

Ndotje akustike janë zërat e padëshiruar që emetohen jashtë, të bezdisshëm ose të dëmshëm, të krijuar nga aktivitetet njerëzore, duke përfshirë zhurmën e emituar nga vendet e aktiviteteve të subjekteve afariste që ofrojnë shërbime të gastronomisë.

Neni 10

Indikatorët e zhurmës

1. Burimet e zhurmës janë çdo vibracion i detektuar nga veshi i njeriut, i shkaktuar nga ndonjë mjet apo aktivitet i njeriut.
2. “Lden” – indikator i zhurmës – ditë – mbrëmje – natë, indikator i zhurmës për shqetësimin e përgjithshëm nga zhurma.
3. “Lditë” – indikator i zhurmës gjatë ditës, indikator i zhurmës për shqetësimin nga zhurma gjatë ditës.
4. “Lmbrëmje” – indikator i zhurmës gjatë mbrëmjes, indikator i zhurmës për shqetësimin nga zhurma gjatë mbrëmjes.
5. “Lnatë” – indikator i zhurmës gjatë natës, indikator i zhurmës për shqetësimin nga zhurma gjatë natës.

Neni 11

Masat mbrojtëse nga ndotja akustike

1. Me masat e mbrojtjes nga ndotja akustike pengohet paraqitja e zhurmës, gjegjësisht zvogëlohet zhurma ekzistuese në nivel optimal, deri në masën që nuk shkakton shqetësim për qytetarët.
2. Mbrojtja nga ndotja akustike aplikohet ditën, në mbrëmje dhe natën. Dita zgjatë 12 orë dhe fillon nga ora 07:00 deri në orën 19:00, mbrëmja zgjat 3 orë dhe fillon nga ora 19:00 deri në orën 22:00, kurse nata zgjat 9 orë dhe fillon nga ora 22:00 deri në orën 07:00 në mëngjes.
3. Të gjitha pajisjet për matjen e nivelit të zhurmës së emituar në ambientet e jashtme (sipër, përreth, poshtë), duhet të mbajnë etiketën CE, shenjën, shkallën e garantuar të fuqisë së zhurmës dhe të jenë të shoqëruara me deklaratën CE të konformitetit.

Neni 12

Pajisjet për matjen e nivelit të zhurmës

1. Kryeqyteti duhet t'i sigurojë pajisjet për matjen e nivelit të zhurmës, të cilat bëjnë matjen e zhurmës së emituar në ambientet e jashtme (sipër, përreth, poshtë), të cilat duhet të mbajnë etiketën CE, shenjën, shkallën e garantuar të fuqisë së zhurmës dhe të jenë të shoqëruara me deklaratën CE të konformitetit.
2. Kryeqyteti duhet të krijojë bazën me të dhënat e subjekteve afariste në sektorin e gastronomisë në territorin e saj, në bazë të së cilës do të bëhet shpërndarja e pajisjeve për matjen e nivelit të zhurmës.
3. Në lokalet e një subjekti afarist, Kryeqyteti duhet të vendosë aq pajisje sa sigurojnë matjen efektive të nivelit të zhurmës nga secili pozicion, të përcaktuar me ekspertizë për mbulimin e nevojshëm të matjes efektive të nivelit të zhurmës të emituar jashtë.

Neni 13

Obligimi për pajisje me certifikatë për nivelin e decibelëve të lejuar

1. Çdo subjekt afarist i sektorit të gastronomisë është i obliguar të pajiset me certifikatë nga drejtoria përkatëse e shërbimeve publike, me të cilin përcaktohet:
 - 1.1. Niveli i decibelëve të lejuar sipas vlerave të përcaktuara në shtojcën 2 të kësaj rregulloreje;
 - 1.2. Obligimi për vendosjen e pajisjes për matje;

1.3. Taksa e njehershme, në vlerë 180 euro për një pajisje, që mbulon shpenzimet e pajisjes, mirëmbajtjes së saj dhe dërgimin e inspektorit në rast të shkeljes me pasojë dëmtimi të pajisjes;

1.4. Data e lëshimit kur hyn në fuqi matja e nivelit të zhurmës në pajtim me procedurat, si dhe kushtet tjera eventuale të përcaktuara me dispozitat e kësaj rregulloreje.

2. Çdo subjekt afarist obligohet që këtë certifikatë ta vendosë në një vend të dukshëm në hapësira të lokalit.

Neni 14

Procedura e aplikimit për certifikatë dhe pajisje për matjen e zhurmës

1. Secili subjekt afarist, që hapet i ri pas hyrjes në fuqi të kësaj rregulloreje, duhet të jetë i pajisur me certifikatë dhe pajisje për matjen e zhurmës në momentin e fillimit të punës.

2. Kryeqyteti obligohet që brenda afatit prej 30 ditësh, nga koha e aplikimit të subjektit afarist, të pajisë të njëjtin me pajisje/et dhe me certifikatën që përcakton nivelin maksimal të lejuar të zhurmës.

Neni 15

Obligimet e subjektit afarist dhe personit përgjegjës të subjektit afarist

1. Personi përgjegjës i subjektit afarist (lokaleve) është i obliguar që të lejojë montimin e pajisjeve për matjen e nivelit të zhurmës në hapësirat e subjektit të tyre afarist. Të njëjtët nuk guxojnë t'i dëmtojnë apo të marrin veprime të cilat pengojnë këto pajisje që të bëjnë matjen e nivelit të zhurmës.

2. Personi përgjegjës i subjektit afarist në sektorin e gastronomisë, duhet të kujdeset që pajisjet për matjen e nivelit të zhurmës të mos dëmtohen nga palët e treta. Përgjegjësinë e dëmtimit nga palët e treta e merr personi përgjegjës i subjektit afarist.

3. Në rast të ndonjë dëmtimi të pajisjes, që të njëjtën e bën jo funksionale, personi përgjegjës i subjektit afarist obligohet që brenda afatit prej 24 orëve, të njoftojë drejtorinë përkatëse për shërbime publike dhe të kërkojë zëvendësimin e pajisjes, duke e paguar taksën prej 180 euro për pajisjen e re. Kryeqyteti obligohet që më së largu për 72 orë të bëjë vendosjen e pajisjes së re.

4. Në rast se konstatohet se dëmtimi i pajisjes ka qenë i qëllimshëm, personi përgjegjës i subjektit afarist obligohet që brenda afatit prej 24 orëve, të njoftojë drejtorinë përkatëse për shërbime publike dhe të kërkojë zëvendësimin e pajisjes, duke e paguar taksën prej

180 euro për pajisjen e re dhe gjobën e përcaktuar në pajtim me dispozitat e kësaj rregulloreje. Kryeqyteti obligohet që më së largu për 72 orë, të bëjë vendosjen e pajisjes së re.

5. Për qëllime të kësaj rregulloreje, personi përgjegjës i subjektit afarist e ka kuptimin sikurse është përkufizuar në nenin 24, paragrafi 1 i Ligjit nr. 05/L-087 për kundërvajtje dhe me nenin 24, paragrafi 3 i Ligji nr. 06/L -016, për shoqëritë tregtare.

Neni 16

Përmbajtja e të dhënave të softuerit

1. Pajisja për matjen e zhurmës monitorohet nga një sistem softueri, të dhënat e të cilit do të mbeten pronë intelektuale e Kryeqytetit dhe përdoren në pajtim me legjislacionin për mbrojtjen e të dhënave personale.

2. Softueri duhet të përmbajë dhe t'i ofrojë të dhënat si në vijim:

- 2.1. Nivelin e tejkaluar të zhurmës në lokalin përkatës;
- 2.2. Datën dhe kohën e tejkalimit të nivelit të zhurmës dhe
- 2.3. Vendin dhe të dhënat e subjektit afarist.

3. Softueri duhet t'i ruajë të dhënat në kohë reale, përfshirë nivelin e zhurmës së emituar jashtë për çdo sekondë, dhe në kohë reale ta njoftojë personin përgjegjës të subjektit afarist për kujdes në tejkalimin e afërt të zhurmës dhe në momentin e tejkalimit të nivelit të lejuar të zhurmës sipas paragrafit 1 të këtij neni.

4. Subjektet afariste do të kenë pamjen e veçantë në softuer për të parë nivelin e zhurmës së shkaktuar nga ta, ku edhe njoftohet kur është afër tejkalimit të nivelit të lejuar të zhurmës, apo veçse është tejkaluar i njëjti. Niveli i zhurmës së emituar nga të gjitha subjektet afariste, pa të dhëna personale, do të mund të shfaqen në një hartë publike ku shihen nivelet sipas zonave në kohë reale.

Neni 17

Tejkalimi i nivelit të lejuar të zhurmës

1. Tejkalimi i nivelit të lejuar të zhurmës, sipas vlerave të përcaktuara në certifikatën e lëshuar për subjektin afarist, në kohë mesatarisht pa ndërprerje mbi 5 minuta, konsiderohet shkelje.

2. Nëse brenda periudhës 5 orë, tejkalimi i nivelit të lejuar të zhurmës përsëritet të paktën tri herë, edhe atë në intervale më të gjata se 2 minuta, gjithashtu konsiderohet shkelje.

Neni 18 Tejkalimi i lejuar për raste të veçanta

Me rastin e plotësimit të nevojave për organizimin e aktiviteteve të veçanta të gastronomisë në hapësira publike, në rastet kur ekzistojnë mundësitë e tejkalimit të nivelit të zhurmës së lejuar, drejtoria kompetente për shërbime publike, mund të lejojë tejkalimin e decibelëve të lejuar, duke caktuar nivelin e decibelëve për atë aktivitet dhe lokacionin e përshtatshëm për qëllime të tilla.

IV. AUTORIZIMET E DREJTORISË SË INSPEKSIONIT

Neni 19 Ndërmarrja e masave dhe veprimeve nga Inspeksioni

1. Drejtoria e Inspeksionit të Kryeqytetit, varësisht nga shkeljet e evidentuara, në pajtim me dispozitat e kësaj rregulloreje, ndërmerri masa dhe shqipton gjopa për shkelësit e evidentuar, duke u bazuar në të dhënat që sigurohen nga softueri.

2. Në rastet kur softueri lajmëron ndërprerjen e funksionit të pajisjes, Inspeksioni duhet të vizitojë subjektin afarist, për të konstatuar nëse pajisja është dëmtuar qëllimshëm dhe të marrë masa dhe veprime adekuate në rast të konstatimit të shkeljes.

Neni 20 Autorizimet e inspektorit për respektimin e orarit të punës dhe të nivelit të zhurmës

1. Gjatë ushtrimit të detyrës, inspektori i është i autorizuar:
 - 1.1. Të konstatojë shkeljen e dispozitave të *orarit të punës* në bazë të kësaj rregulloreje, përmes kontrollit të drejtpërdrejtë;
 - 1.2. Të konstatojë shkeljen e dispozitave të *niveleit të zhurmës* përmes të dhënave të cilat sigurohen vetëm nga softueri. Për sa i përket nivelit të zhurmës, inspektori nuk ka të drejtë të kontrollit të drejtpërdrejtë dhe as nuk mund të shfrytëzojë mjete të tjera për matjen e zhurmës, përveç mjetit/et të autorizuar që vendoset në lokalin afarist.
 - 1.3. Të urdhërojë ndërmarrjen e masave të menjëhershme për evitimin e shkeljes së konstatuar;
 - 1.4. Të urdhërojë subjektin afarist, përkatësisht personin e autorizuar të të njëjtit, që të respektojë orarin e punës të përcaktuar me këtë rregullore;

- 1.5. Të urdhërojë subjektin afarist, përkatësisht personin e autorizuar të të njëjtit, që të ndërpresë përdorimin e burimit që shkakton zhurmë përtej nivelit të lejuar të zhurmës;
- 1.6. Të ndërmarrë të gjitha masat ndëshkuese dhe të shqiptojë gjobë për mosrespektim të orarit të punës, apo për tejkalim të nivelit të përcaktuar të zhurmës, në pajtim me dispozitat e kësaj rregulloreje.

VI. DISPOZITAT NDËSHKIMORE

Neni 21 Kundërvajtjet

1. Inspektori i inspektoratit të Kryeqytetit, ka të drejtë që të shqiptojë gjoba në pajtim me legjislacionin në fuqi. Për shkeljet e dispozitave të kësaj rregulloreje, varësisht nga niveli i shkeljeve dhe në përputhje me rrethanat ku ndodh shkelja, do të shqiptohen gjobat në vlerë minimale prej 500 euro dhe në vlerë maksimale prej 5,000 euro.
2. Duke marr parasysh vlerën minimale dhe maksimale të gjobave të përcaktuara me këtë rregullore, inspektori i inspektoratit të Kryeqytetit me rastin e shqiptimit të gjobave, duhet t'i vlerësojë rrethanat dhe gjobat t'i shqiptoj duke filluar nga vlerat minimale për shkeljet e evidentuara. Në rastet kur përsëriten shkeljet dhe kemi edhe rrethana tjera rënduese, gjobat duhet të shqiptohen në ekuivalencë me shkeljen e evidentuar.
3. Gjobat e përcaktuara për shkeljet e dispozitave të kësaj rregulloreje, janë si në vijim:
 - 3.1.Me gjobë prej 500 deri në 2,000 euro, do të dënohet subjekti afarist i cili nuk e ka respektuar orarin e përcaktuar të punës, të përcaktuar me nenin 6 të kësaj rregulloreje;
 - 3.2.Me gjobë prej 3,000 deri në 5,000 euro, do të dënohet subjekti afarist i cili nuk ka aplikuar dhe rrjedhimisht nuk është pajisur me certifikatën për përcaktimin e nivelit të decibelëve, si dhe nuk ka marrë pajisjet për matjen e zhurmës, ashtu siç është përcaktuar me nenin 13 të kësaj rregulloreje;
 - 3.3.Me gjobë prej 3,000 deri në 5,000 euro, do të dënohet subjekti afarist i cili pengon montimin e pajisjeve për matjen e zhurmës në hapësirat e subjektit afarist, apo merr veprime të cilat i pengojnë këto pajisje që të bëjnë matjen e nivelit të zhurmës, ashtu siç është përcaktuar me nenin 15, paragrafi 1 i kësaj rregulloreje;

- 3.4.Me gjobë prej 3,500 deri në 5,000 euro, do të dënohet subjekti afarist i cili ka dëmtuar qëllimisht pajisjen për matjen e zhurmës, ashtu siç është përcaktuar në nenin 15, paragrafi 4 i kësaj rregulloreje.
- 3.5.Me gjobë prej 1,000 deri në 3,000 euro, do të dënohet subjekti afarist i cili ka tejkalar nivelin e përcaktuar të decibelëve të lejuar sipas dispozitave të kësaj rregulloreje dhe rrjedhimisht ka shkaktuar zhurmë.
- 3.6.Me gjobë prej 3,000 deri në 5,000 euro do të dënohet organizatori i aktiviteteve të veçanta të gastronomisë në hapësira publike, i cili ka tejkalar nivelin e decibelëve të lejuar për aktivitete të veçanta, ashtu siç është përcaktuar me nenin 18 të kësaj rregulloreje.
4. Në rastet e përsëritjeve të shkeljeve dhe kur Inspektori e vlerëson gjendjen, mund të ndalojë kryerjen e veprimtarisë së caktuar personit fizik apo juridik me urdhëresë, në kohëzgjatje më së shumti prej 8 ditësh.
5. Për të gjitha procedurat e shqiptimit të kundërvajtjeve, mënyrës dhe afateve të pagesës së gjobave, si dhe procedurave të tjera lidhur me gjobat të cilat nuk janë rregulluar me dispozitat e kësaj rregulloreje, vlejné dispozitat e Ligjit për kundërvajtje.

VII. PROCEDURA E ANKESËS

Neni 22

E drejta dhe procedura e ankesës

1. Kundër vendimit të lëshuar nga inspektori, mund të ushtrohet ankesë pranë komisionit për shqyrtimin e ankesave në Kryeqytet, në afat prej tridhjetë (30) ditësh nga dita e pranimit të aktit administrativ.
2. Procedurat dhe afatet lidhur me trajtimin dhe vendosjen e ankesave nga ana e komisionit për shqyrtimin e ankesave, zhvillohen në përputhje me dispozitat e Ligjit të procedurës së përgjithshme administrative.
3. Përgjithimisht nga pika 2 e këtij neni, në rastin e shqyrtimit dhe vendosjes së ankesës kundër ndalimit të ushtrimit të veprimtarisë deri në 8 ditë, komisioni për shqyrtimin e ankesave në Kryeqytet, vendos brenda afatit prej dyzet e tetë (48) orësh nga dita e pranimit të ankesës. Afati prej dyzet e tetë orësh llogaritet në ditë pune.
4. Ankesa e palës, e drejtuar në Gjykatën kompetente, kundër vendimit të komisionit, nuk e shtyn ekzekutimin e vendimit të inspektorit.

VIII. DISPOZITAT KALIMTARE DHE HYRJA NË FUQI

Neni 23

Dispozitat shfuqizuese dhe kalimtare

1. Me hyrjen në fuqi të kësaj rregulloreje, shfuqizohen dispozitat e Rregullores për orarin e punës, si dhe vendimi i Kuvendit të Komunës së Prishtinës që përcakton orarin e punës për subjektet afariste të gastronomisë, e që përcaktohen me këtë rregullore.
2. Pas hyrjes në fuqi të kësaj rregulloreje, subjektet afariste që janë aktive duhet të aplikojnë brenda afatit prej 30 ditësh pranë drejtorisë përkatëse të shërbimeve publike në Kryeqytet, që të pajisen me certifikatën e cila përcakton nivelin maksimal të lejuar të decibelëve, si dhe me pajisjen për matjen e zhurmës.
3. Kryeqyteti obligohet që brenda afatit prej 30 ditësh, të pajisë subjektin afarist me pajisje/t dhe me certifikatën që përcakton nivelin maksimal të lejuar të zhurmës.
4. Prej momentit të hyrjes në fuqi të kësaj rregulloreje e deri më 31 mars 2023, konsiderohet periudhë e vetëdijesimit dhe informimit për subjektet afarist, brenda së cilës periudhë nuk do të aplikohen masat dhe gjobat e parapara me këtë rregullore.

Neni 24

Shtojcat e rregullores

Kjo rregullore ka të bashkëngjitura dy shtojca:

1. Shtojca për ndarjen e zonave urbane, periferike dhe rurale të Kryeqytetit,
 2. Shtojca për vlerat e lejuara të emisioneve të zhurmës.
2. Shtojcat e përcaktuar me këtë nen konsiderohen pjesë përbërëse të Rregullores. Ato duhet të zbatohen nga organet e Kryeqytetit dhe nga subjektet afariste të sektorit të gastronomisë.

Neni 25
Hyrja në fuqi

Kjo Rregullore hyn në fuqi 15 (pesëmbëdhjetë) ditë pas regjistrimit në Zyrën e protokollit të Ministrisë së Administrimit të Pushtetit Lokal dhe 7 (shtatë) ditë pas publikimit në gjuhët zyrtare në ueb-faqen e Komunës.

KUVENDI I KRYEQYTETIT
01-110/04-277218/22, më 29.12.2022

KRYESUESI I KUVENDIT
Fehmi Kupina

